

Protestaldiak

Pikutara Jokoak!

Aborigenen eskubideen aldeko eta Olinpiar Jokoen aurkako manifestazioak egin zituzten atzo Sydneyn

I. Murua Uria / Sydney
berriemaile berezia

«BETI IZAN DA, beti izango da aborigenen lurra!» oihu egin ez abiatu ziren ehunka lagun, zuri eta beltz, Sydneyko Victoria Parketik hirigunera, atzo eguerdian, Olinpiar Jokoen irekiera ofizialaren egunean. Ezker-eskuin bizikleta gainean zihoazen polizia babetuta, manifestazioaren aurre eta atzean polizi autoak zituztela, aborigenen eskubideen aldeko leloak eta Olinpiar Jokoen aurkako oihukatu zituzten bide osoan.

Bandera aborigen handiak zabaltzen zuen martxa; beltza eta gorria, erdian borobil horiarekin. Lurraren kolorea da beltza, odolarena gorria eta eguzkiarena horia. Atzean, pankarta eta afixak. *Howard-en* [lehen ministroa] sistema; ume lapurtuak, lur lapurtua, zioen batek. *Justizia soziala Jokoak baino lehen*, irakur zitekeen beste batean. Pankarta zuri batean, Jokoetako diru xahutzea salatzen zen; Herri indigen giza eskubideak urratzen gelditzeko eskatzen zion Australiako Gobernuari, aldiz, Alderdi Demokratiko Sozialistak sinatutakoak.

«Justiza bai, arrazismoa ez!», abestu zuten sarri. Baita zurien eta beltzen arteko batasunari buruzko leloa ere: «Zurien eta beltzen arteko ba-



Goian, aborigenen eskubideen aldeko eta Jokoen aurkako manifestazioa. Behean, manifestazioa zaintzera ateratako Polizia, bizikleta gainean, eta Aborigenen Enbaxadako bozeramaile bat, su sakratura inguratutakoei hitz egiten, poliziak ondoan dituela.



I. MURUA URIA

tasuna! Justizia eta berdintasuna! Arrazismorik ez arbola-pean!».

Gazteak ziren manifestari gehienak, eta aborigen baino zuri gehiago.

Manifestazioa eta su sakratua

Manifestazioa baino bi ordu lehenago, goizeko hamarretan hasita, Aborigenen Enba-

xada kanpalekuko kideekin batera, su sakratuaren zeremonia egin zuten manifestatzaileek. Mila lagunetik gora bildu ziren han. Baina Enbaxako kideek ez zuten martxa

babestu eta, manifestatzaileak kalean behera abiatu zirenean, beste hainbeste jendek Parkean geratzea erabaki zuen, su sakratuaren inguruan. Aborigenak ziren suaren inguruko gehienak, zuriak gehiago manifestatzaileen artean.

Kanpalekua eta su sakratua Jokoen aurkako ekitaldiak ez zirela garbi utzi nahi izan zuen Aborigenen Enbaxadako bozeramaile nagusiak, Isabelle Coek. «Hau bakea eta justizia eskatzeko ospakizuna da. Hau ez da Olinpiar Jokoei buruz. Hau guri buruz da, eta gurea Jokoak baino handiagoa da!». Isabell Coek «gudari gaztetzat» aurkeztu zituen hizlari gazteagoek ere hartu zuten hitza, ordea. «Bakearen Enbaxadaren» lana errespetatzen eta miresten duela esan zuen batek, baina bakerik ez dela: «Akordiorik ez bada, subiranotasunik ez bada, bakerik ere ez da!». Bigarren hizlariaren ahotik, berriaz, «*Fuck the Olympics!*» («Pikutara Olinpiar Jokoak!») eta «Hitz

gutxiago eta ekintza gehiago!» esaldiak entzun ziren.

Ageriko eztabaida eta tentsioa ere izan zen manifestazioan joan zirenen eta Enbaxako ordezkarien artean. Olinpiar Jokoen aurkako manifestazioa kanpalekutik abiatu zen azkenean. Enbaxakoek handik ez abiatzeko eskatu zieten arren.

Aborigenen eskubideen alde eguerdian egirikoa ez zen Jokoen aurkako ekitaldi bakarra izan. Arratsaldeko lauak aldera

Sydneyko Olinpiar Parkera joateko asmoa zuen Anti-Olympic Alliance taldeak deitutako manifestazioak, Bressington parketik abiatuta.



Astra

Asfaltora josia.

ASTRA

www.opel.es

TALLERES OLA

Olabarrena auzoa, z/g.
Tels.: 943 76 47 74 / 33 46.
BERGARA.

Zerbitzu ofiziala ARRASATEN
TAKOLO AUTOAK, S.L.
Araba Etorbidea, 3.(escatu pabiloia).
Tel.: 943 79 05 86